

18/02/2003

`Isu Iraq wajar dijadikan kempen antiperang sejagat'

KUALA LUMPUR: Pergerakan Negara-negara Berkecuali (NAM) disaran menjadikan kebangkitan masyarakat antarabangsa menentang rancangan Amerika Syarikat menyerang Iraq sebagai peluang untuk memperjuangkan kaedah antiperang dalam menangani konflik dunia.

Presiden Pergerakan Keadilan Sedunia (Just), Dr Chandra Muzaffar, berkata NAM mempunyai fungsi penting untuk menggalakkan kaedah rundingan dan perbincangan dalam menyelesaikan sebarang konflik.

"Saya percaya wujud satu kuasa kuat yang cintakan keamanan di seluruh dunia. Sebagai contoh, perkembangan di Iraq kebelakangan ini menyaksikan betapa kuatnya sentimen antiperang di seluruh dunia.

"Begitu juga ketika konflik di Bosnia-Herzegovina. Lebih 300,000 penduduk di Bonn, Jerman berkumpul dan menyuarakan bantahan terhadap serangan ke atas wilayah itu," katanya.

Beliau berkata, NAM harus melihat perkembangan itu dan menggunakannya untuk memperjuangkan kaedah antiperang dalam menangani konflik dunia.

Dr Chandra berkata, pendekatan perang atas alasan untuk menyelesaikan konflik dunia, akan berterusan kecuali masyarakat antarabangsa terus menentangnya.

Beliau berkata demikian pada sesi perbincangan mengenai NAM anjuran Institut Kajian Strategik dan Antarabangsa (Isis) di sini, semalam.

Sesi perbincangan itu yang dipengerusikan Ketua Pengarah Isis, Datuk Mohamed Jawhar Hassan turut disertai Wakil Tetap Malaysia ke Pertubuhan Bangsa-Bangsa Bersatu (PBB); Tan Sri Hasmy Agam; Pesuruhjaya Tinggi Afrika Selatan, Dr Abraham Sokhaya Nkomo dan Pesuruhjaya Tinggi India, Veena Sikri.

Pendapat Dr Chandra disokong Pesuruhjaya Tinggi India, yang berkata NAM harus memainkan fungsinya untuk mencari jalan penyelesaian yang pragmatik, bersepadu dan yang tidak akan menimbulkan sebarang konfrontasi bagi menangani konflik sesama negara anggota atau dunia.

"Kita harus yakin yang kita boleh melaksanakan tanggungjawab ini. Yang penting, kita perlu tahu kekuatan kita. NAM adalah pertubuhan kedua terbesar selepas PBB dan sewajarnya, kita boleh membawa perubahan kepada dunia," katanya.

Sementara itu, Dr Nkomo berkata cabaran utama NAM, khususnya pada sidang kemuncak di sini dari 20 hingga 25 Februari ini, adalah untuk memerangi dan membasmi kemiskinan, yang dianggap sebagai satu sebab utama berlakunya keganasan.

"Usaha membasmi kemiskinan harus dijadikan keutamaan dalam agenda global hari ini. Untuk tujuan itu, NAM harus berusaha mengukuhkan kerjasama antara negara Selatan-Selatan dan pada masa yang sama, memperbanyakkan dialog berhubung isu berkenaan dengan negara Utara," katanya.

Presiden Doktor Antarabangsa Menentang Peperangan Nuklear, Dr R S McCoy, yakin Malaysia dapat memainkan fungsinya bagi memastikan matlamat NAM, dicapai berikutan kewibawaan dan kepimpinan Perdana Menteri, Datuk Seri Dr Mahathir Mohamad.